

史

通

訓

故

補

書以通名如白虎通風俗通之
類義同箋故漢封司馬遷後為
史通子史通之稱見焉劉知幾
博論前史摭掇利病作史通內
外篇蓋兼取兩義云馬貴與經
籍考從文史類中摘出論史者
為史評首列是書本傳謂知幾

幼時受古文尚書業不進聽講
春秋左氏則心開異哉同一學
問之事而胎性中各有着根處
不自知其所以然後來領國史
三十年卒以史學垂名豈所謂
性也有命焉者耶觀其議論如
老吏斷獄難更平反如夷人嗅

金暗識高下如神醫眼照垣一方洞見五藏癥結間有過執已見以裁量往古泥定體而少變通如謂尚書為例不純史論淡薄無味之類然其奮萃搜擇鉤鈎排擊上下數千年貫穿數萬卷心細而眼明舌長而筆辣雖

馬班亦有不能自解免者何況其餘書在文史類中允與劉孝和之雕龍相匹徐堅謂史氏宜置座右信也綜練淵博其中瑣詞僻事非注不顯注家王損仲本為善林居多暇竊為刪繁補遺重梓行世使當時自比楊雄

擬易以為必霞醬瓿者千餘年
後復紙貴於蘭臺石室間亦嗜
古之士所欣慰也

乾隆十有二年丁卯仲春既望
北平黃叔琳崑圃氏序

史通訓故原序

余既注文心雕龍畢因念黃太史有云論文則文
心雕龍評文則史通二書不可不觀實有益於後
學復欲取史通注之中牟張林宗年兄以江右郭
氏史通評釋相示讀之與余意多不合乃以向注
文心之例注焉歷八月訖功然此二書譌處甚多
嗣從信陽王思延得華亭張玄超本其文心不能
加他本史通本大善有數處極快人者故書之校
視文心為愈往見李濟翁資暇錄云李善注文選

有初注再注以至四五注者蘇子由注老子亦自言晚年於舊注多所改定今余此書曷敢以為盡是聊以備遺忘為他日削藁之資耳河南王惟儉

史通序錄

唐鳳閣舍人彭城劉子玄撰

長安二年余以著作佐郎兼修國史尋遷左史於門下撰起居注會轉中書舍人暫停史任俄兼領其職今上即位除著作郎太子中允率更令其修史皆如故又屬大駕還京以留後在都無幾驛徵入京專知史事仍遷秘書少監自惟歷事二主從官兩京遍居司籍之曹久處載言之職昔馬融三入東觀漢代稱榮張華再典史官晉朝稱美嗟予

小子兼而有之是用職司其憂不遑啟處嘗以載
削餘暇商確史篇下筆不休遂盈筐篋於是區分
類聚編而次之昔漢世諸儒集論經傳定之於白
虎閣因名曰白虎通子既在史館而成此書故便
以史通為目且漢求司馬遷後封為史通子是知
史之稱通其來自久博采眾議爰定茲名凡為廿
卷列之如左合若干言除所闕篇凡八萬三千三百五十二字註五千四百
九于時歲次庚戌景龍四年仲春之月也

唐書長安則天皇太后改元
後漢書馬融於永初四年拜校書郎詣東觀典

校秘書忤鄧太后自劾歸安帝親政召還郎署忤梁冀髡徙朔方赦還復拜議郎重在東觀著述

晉書張華為太常博士轉河南尹丞未拜除佐著作郎後又代下邳王晃為司空領著作後漢書建初中大會諸儒於白虎觀考詳同異連月乃罷肅宗親臨稱制如石渠故事顧命史臣著為通義

前漢書司馬遷死後其書稍出宣帝時遷外孫楊惲祖述其書遷宣布焉至王莽時求封遷後為史通子

史通序錄終

史通訓故補序錄

唐書劉子玄傳

劉子玄名知幾以玄宗諱嫌故以字行年十二父藏器為授古文尚書業不進父怒楚督之及聞為諸兄講春秋左氏冒往聽退輒辨析所疑嘆曰書如是兒何怠父奇其意許授左氏踰年遂通覽羣史與兄知柔俱以善文詞知名擢進士第調獲嘉主簿武后證聖初詔九品以上陳得失子玄上書譏每歲一赦或一歲再赦小人之幸君子之不幸又言君不虛授臣不虛受妄受不為忠妄施不為

惠今羣臣無功遭遇輒遷至都下有車載斗量把
推腕脫之諺又謂刺史非三載以上不可徙宜課
功殿明賞罰后嘉其直不能用也時吏橫酷淫及
善人公卿被誅死者踵相及子玄悼士無良而甘
於禍作思慎賦以刺時蘇味道李嶠見而嘆曰陸
機豪士之流乎周身之道盡矣子玄與徐堅元行
沖吳兢等善嘗曰海內知我者數子耳累遷鳳閣
舍人兼修國史中宗時擢太子率更令介直自守
累歲不遷會天子西還子玄自乞留東都三年或

言子立身史臣而私著述驛召至京領史事遷秘書監時宰相韋巨源紀處訥楊再思宗楚客蕭至忠皆領監修子立病長官多意尚不一而至忠數責論次無功又仕偃蹇乃奏記求罷去因為至忠言五不可曰古之國史皆出一家未聞藉功於衆唯漢東觀集羣儒纂述無主條章不建今史司取士滋多人自為荀袁家自為政駿每記一事載一言閣筆相視含毫不斷頭白可期汗青無日一不可漢郡國計書上太史副上丞相後漢公卿所撰

先集公府乃上蘭臺故史官載事為廣今史官唯
自詢采二史不注起居百家不通行狀二不可史
局深籍禁門所以杜顏面防請謁也今作者如林
儻示褒貶曾未絕口而朝野咸知孫盛取嫉權門
王劭見讐貴族常人之情不能無畏三不可古者
史氏各有指歸故司馬遷退處士進姦雄班固抑
忠臣飾主闕今史官注記類稟監修或須直辭或
當隱惡十羊九牧其令難行四不可今監者不肯
指授修者又不遵奉務相推避以延歲月五不可

又言朝廷厚用其才而薄其禮至忠得書悵惜不
許楚客等惡其言詆切謂諸史官曰是子作書欲
致吾何地始子立修武后實錄有所改正而武三
思等不聽自以為見用於時而志不遂乃著史通
內外四十九篇譏評今古徐堅讀之歎曰為史氏
者宜置此坐右也又嘗自比揚雄者四雄好雕蟲
小技老而為悔吾幼喜讀詩賦而壯不為期以述
者自名雄準易作經當時笑之吾作史通俗以為
愚雄著書見尤於人作解嘲吾亦作釋蒙雄少為

范逡劉歆所器及聞作經以為必覆醬瓿吾始以文章得譽晚談史傳由是減價其自感槩如此子玄內負有所未盡乃委國史於吳兢別撰劉氏家史及譜考上推漢為陸終苗裔非堯後彭城叢亭里諸劉出楚孝王囂曾孫居巢侯般不承元王按據明審議者高其博嘗曰吾若得封必以居巢紹司徒舊邑後果封居巢縣子鄉人以其兄弟六人俱有名號其鄉曰高陽里曰居巢累遷太子左庶子兼崇文館學士皇太子將釋奠國學有司具儀

從臣著衣冠乘馬子玄議古大夫以上皆乘車以馬為駢服魏晉後以牛駕車江左尚書郎輒輕乘馬則御史劾治顏延年罷官乘馬出入閭里世稱放誕此則乘馬宜從褻服之明驗今陵廟巡謁王公冊命士庶親迎則盛服冠履乘輅車他事無車故貴賤通乘馬比法駕所幸侍臣皆馬上朝服且冠履唯可配車故博帶褒衣革履高冠是車中服韞而蹻跣而鞍非唯不師于古亦自取驚流俗馬逸人顛受嗤行路太子從之因著為定令開元初

遷左散騎常侍嘗議孝經鄭氏學非康成注舉十二條左證其謬當以古文為正易無子夏傳老子書無河上公注請存王弼學宰相宋璟等不然其論奏與諸儒質辯博士司馬貞等阿意共黜其言請二家通行惟子夏易傳請罷詔可會子貺為太樂令抵罪子立請於執政立宗怒貶安州別駕卒年六十一子立領國史且三十年官雖徙職常如舊禮部尚書鄭惟忠嘗問自古文士多史才少何耶對曰史有三長才學識世罕兼之故史者少夫

有學無才猶愚賈操金不能殖貨有才無學猶巧
匠無梗枘斧斤弗能成室善惡必書使驕君賊臣
知懼此為無可加者時以為篤論子玄善持論辯
據明銳視諸儒皆出其下朝有論著輒豫歿後帝
詔河南就家寫史通讀之稱善追贈工部尚書謚
曰文六子貺餼彙秩迅廻

例言 六則

一史通向有陸儼山校本為學者所宗江右鄧延年更以別本讎對多所竄易河南王損仲獨得宋時舊本比之他刻為長而魯魚亥豕尚有沿誤如誤凡為煩誤薦為燕誤名為君誤愚為偶之類今並檢閱諸家所定一一更正其有字句各殊義可兩用者棄短錄長頗費裁擇而於所改之下本字本句仍為存注不敢漏畧至若舊簡脫誤文義難曉悉經鈎剔以俟來者審焉

一史通舊鮮訓釋惟延年所注盛行書塾而援引
踳駁枝蔓無益又踈於考訂每多紕繆後損仲
更注史通名曰訓故依据正史選擇精嚴遠勝
郭書然傷於太簡未免遺脫今為旁搜博採廣
所未備庶幾繁簡得中於本書不無少補云
一注意當與本書比附方見明悉如本書謂董袁
諸人不當列之魏志而王氏不援陳書轉述班
傳本書謂陳壽補注季漢輔臣贊而王氏但稱
楊戲撰述不及承祚注疏本書引司馬錯張儀

伐蜀之事事出華陽國志而王氏泛引史記多與書義不相蒙合如斯之類並經改注

一自古注家每於本書違誤之處多所檢正史通隸事甚繁難免無失如楊由聽雀漢初立轡國僑辨黃熊文王殺季歷之類王氏或缺而不注或注而不全未合古人檢正本書之義又若魏志本無劉虞劉炫並非學士書既以訛傳訛注復將錯就錯是又矯郭氏之踳駁而失之者也今或添注卷尾或指駁上方庶不疑誤後學非

敢好撫前人

一劉氏排拓萬古推倒一世而賢知之過未免失中今於議論精當之處仍照前刻文心雕龍之例加之圈點以誌別擇偶有臆見附列上方未知有當否也

一是書增補王氏所未備雖於原注稍有刪節仍存舊名而愚所加注並標補字以別之不敢掠前人之美也耳目短淺尚有數處闕疑惟博雅君子有以誨其不及焉

史通訓故補目錄

卷之一 內篇

六家第一

卷之二

二體第二

載言第三

本紀第四

世家第五

列傳第六

卷之三

表歷第七

書志第八

史通訓故補目錄

卷之四

論贊第九

序例第十

題目第十一

斷限第十二

編次第十三

稱謂第十四

卷之五

採撰第十五

載文第十六

補註第十七

因習上第十八

因習下第十九

卷之六

言語第二十

浮詞第二十一

叙事第二十二

卷之七

品藻第二十三

直書第二十四

曲筆第二十五

鑒識第二十六

探賸第二十七

卷之八

模擬第二十八

書事第二十九

人物第三十

卷之九

覈才第三十一

序傳第三十二

煩省第三十三

卷之十

雜述第三十四

辨職第三十五

自叙第三十六

體統

缺

紕繆

缺

弛張

缺

卷之十一

外篇

史官建置第一

卷之十二

古今正史第二

卷之十三

疑古第三

惑經第四

卷之十四

申左第五

卷之十五

黜煩第六

卷之十六

雜說上第七

卷之十七

雜說中第八

卷之十八

雜說下第九

卷之十九

五行志錯誤第十 五行志雜駁第十一

卷之二十

暗惑第十二

忤時第十三

目錄終

史通訓故補卷之一

北平黃叔琳崑圃補註

海虞顧鎮備九叅訂

吳門張鳳孫少儀同訂

內篇

六家第一

自古帝王編述文籍外篇言之備矣古往今來質
文遞變諸史之作不恒厥體推而為論其流有六
一曰尚書家二曰春秋家三曰左傳家四曰國語

六家體製人
口習而不知

一經提明覺
衆若列眉

家五曰史記家六曰漢書家今畧陳其義列之於
後

尚書家

尚書家者其先出於太古易曰河出圖洛出書聖
人則之故知書之所起遠矣至孔子觀書於周室
得虞夏商周四代之典乃刪其善者定為尚書百
篇孔安國曰以其上古之書謂之尚書尚書璇璣
鈴曰尚者上也上天垂文以布節度如天行也王
肅曰上所言下為史所書故曰尚書也惟此三說

堯典星鳥星
火舜典璇璣
齊政天文也
封山肇州濟
川地理也不
得以人事盡
之禹貢錫土
姓封建也賦
止中下錯井
田也不得以
地理盡之洪
範建極錫極
無作威福人
事也不得以
灾祥盡之顧
命無改咎逾
無以創冒貢
於非幾亦言

其義不同。蓋書之所主，本於號令，所以宣王道之
之正義，發話言於臣下，故其所載，皆典謨訓誥誓
命之文。至如堯舜二典，直序人事，禹貢一篇，惟言
地理，洪範總述灾祥，顧命都陳喪禮，茲亦為例不
純者也。又有周書者，與尚書相類，即孔氏刊約百
篇之外，凡為七十二章，上自文武，下終靈景，其有
明允篤誠，典雅高義，時亦有淺末恒說，滓穢相參，
殆似後之好事者所增益也。至若職方之言，與周
官無異，時訓之說，比月令多同，斯百王之正書，五

人事也不得
以喪禮盡之
百王之書各
因乎時安有
既例可傳耶

經之別錄者也。自宗周既殞，書體遂廢。迄乎漢魏，無能繼者。至晉廣陵相魯國孔衍，以為國史所以表言行，昭法式，至於人理常事，不足備列，乃刪漢魏諸史，取其美詞典言，足為龜鏡者，定以篇第纂成一家。由是有漢尚書、後漢尚書、漢魏尚書，凡為二十六卷。至隋秘書監太原王劭，又錄開皇仁壽時事，編而次之，以類相從，各為其目，勒成隋書八十卷。尋其義例，皆准尚書。原夫尚書之所記也，若君臣相對，詞旨可稱，則一時之言，累篇咸載。如言

無足紀語無可述

有脫誤

若此故事雖脫畧而觀者

不以為非爰逮中葉文集大備必剪截今文模擬古法事非改轍理涉守株故舒元所撰漢魏等篇不行於代也若乃帝王無紀公卿缺傳則年月失序爵里難詳斯並昔之所忽而今之所要如君懋隋書雖欲祖述商周憲章虞夏觀其體制乃似孔氏家語臨川世說可謂畫虎不成反類犬也故其書受嗤當代良有以焉

前漢書儒林傳孔氏有古文尚書孔安國以今文字讀之起家為漢武帝博士

困學記聞書緯璿璣鈴

魏志王肅字子雍東海人黃初中官散騎侍郎初肅善賈馬之學而不好鄭氏采會同異爲尚書詩論語三禮左氏解及撰定父朗所作易傳皆列於學宮

前漢書藝文志周書七十一篇注劉向云周時詒誓號令蓋孔子所論百篇之餘也

周書時訓解第五十二職方解第六十二

尚書有周官禮記有月令

晉書孔衍字舒元孔子二十二世孫補中書郎

王敦惡之出爲廣陵相

北史王劭字君懋太原人北齊待詔文林館隋

文受禪遷秘書少監

北史開皇仁壽俱隋文帝改元

韓子宋人有耕者田中有株兔走觸之折頸而

死因釋耕守株冀復得兔爲宋國笑

南史劉義慶長沙景王之子臨川王道規薨無

嗣乃以慶爲嗣歷官尚書左僕射慶愛好文義

撰世說十卷

〔補注〕

唐書藝文志孔衍漢尚書十卷後漢尚書六卷
漢魏尚書十四卷

隋書王劭傳劭撰隋書十八卷多錄口勅又採
迂怪不經之語及委巷之言以類相從為其題
目辭義繁雜無足稱者

漢書藝文志孔子家語二十七卷通考王肅注
後序曰孔子家語者皆當時公卿士大夫及七
十二弟子之所諮訪交相對問言語也弟子取
其正實而切事者別出為論語其餘則都集錄
之名之曰孔子家語晁氏曰序注凡四十四篇
劉向校錄止二十七篇後王肅得此於孔子二
十四世孫猛家

春秋家

春秋家者其先出於三代案汲冢璣語記太丁時

事目為夏殷春秋。孔子曰：「䟽通知遠，書教也。」屬時比事，春秋之教也。知春秋始作，與尚書同時。璅語又有晉春秋。記獻公十七年事。國語云：「晉羊舌肸習於春秋。」悼公使傅其太子。左傳昭二年：「晉韓宣子來聘，見魯春秋，曰：『周禮盡在魯矣。』」斯則春秋之目，事匪一家。至於隱沒無聞者，不可勝載。又案竹書紀年，其所記事皆與魯春秋同。孟子曰：「晉謂之乘，楚謂之檮杌，而魯謂之春秋，其實一也。」然則乘與紀年檮杌，其皆春秋之別名者乎？故墨子曰：「吾

見百國春秋蓋皆指此也。逮仲尼之修春秋也，乃觀周禮之舊法，遵魯史之遺文，據行事，仍人道，就敗以明罰，因興以立功，假日月而定歷數，藉朝聘而正禮樂，微婉其說，隱晦其文，為不刊之言，著將來之法，故能彌歷千載，而其書獨行。又案儒者之說春秋也，以事繫日，以日繫月，言春以包夏，舉秋以兼冬，年有四時，故錯舉以為所記之名也。苟如是，則晏子、虞卿、呂氏、陸賈，其書篇第本無年月，而亦謂之春秋，蓋有異於此者也。至太史公著史記

始以天子為本紀考其宗旨如昔春秋自是為國
史者皆用斯法然時移世異體式不同其所書之
事也皆言罕褒諱事無黜陟故馬遷所謂整齊故
事耳安得比於春秋哉

晉書武帝咸寧五年汲郡人不準掘魏襄王冢
得竹簡小篆古書十餘萬言藏於秘府
史記十二諸侯年表獻公十七年申生將軍君
子知其廢

國語晉悼公問司馬侯曰何謂德義曰諸侯之
為日在君側以其善行以其惡戒可謂德義矣
公曰孰能曰平舌彤習於春秋公召叔向使傳
太子彪

左傳韓宣子來聘觀書於太史氏見易象與魯
春秋曰周禮盡在魯矣

隋書經籍志：汲冢竹書紀年十二卷，紀年用夏正，定寅之月為歲首，記夏殷周三代王事，無諸侯國，惟特紀晉國，起自齊叔，以至曲沃莊伯，盡晉國滅，獨記魏事，至哀王謂之今王，蓋魏國之史記也。其編年相次，文意大似春秋，諸所記事，多與春秋左氏扶同。

史記：虞卿游說之士也，為趙上卿，故號虞卿。其後與魏齊間行去，趙困於梁，不得意，乃著書八篇，以刺譏國家失得，世傳之曰虞氏春秋。

史記：呂不韋，陽翟人，始皇尊為相國，號仲父。不韋使客人人著所聞，集論以為八覽、六論、十二紀，號曰呂氏春秋。

史記：陸賈，楚人，以客從高祖，定天下，索隱曰：賈撰記項氏與漢高祖初起，及說惠文間事，名曰楚漢春秋。

史記：司馬遷自序：余所謂述故事，整齊其世傳，非所謂作也。而君比之於春秋，謬矣。

補注

秋左傳皆
年之祖似

隋書經籍志古文瓌語四卷汲冢書

公羊傳既因序云昔孔子受端門之命制春秋之義使子夏等十四人求周史記得百二十國寶書據此則墨子所言百國春秋即是書也蓋晉楚諸史不名春秋而云百國春秋者概言之耳

春秋左傳杜預序云春秋者魯史記之名也記事者以事繫日以日繫月以月繫時以時繫年所以紀遠近別同異也故史之所記必表年以首事年有四時故錯舉以為所記之名也史記管晏列傳贊太史公曰吾讀管氏牧民山高乘馬輕重九府及晏子春秋

左傳家

左傳家者其先出於左丘明孔子既著春秋而丘明授經作傳蓋傳者轉也轉受經旨以授後人或

不應區分但
經提綱而寓
褒貶傳詳目
而惟書事圓
是二途也

曰傳者傳也、上傳去聲下傳平聲所以傳示來世、案孔安國
注尚書亦謂之傳、斯則傳者亦訓釋之義乎、觀左
傳之釋經也、言見經文而事詳傳內、或傳無而經
有、或經闕而傳存、其言簡而要、其事詳而博、信聖
人之羽翮而述者之冠冕也、逮孔子云、述經傳不
作、于時文籍惟有戰國策及太史公書而已、至晉
著作郎魯國樂資乃追采二史、撰為春秋後傳、其
始以周貞王續前傳、魯哀公後至王赧入秦、又以
秦文王之繼周、終於二世之滅、合成三十卷、當漢

代史書以遷固為主而紀傳互出表志相重於文
為煩頗難周覽至孝獻帝始命荀悅撮其書為編
年體依左傳著漢紀三十篇自是每代國史皆有
斯作起自後漢至於高齊如張璠孫盛干寶徐賈
裴子野吳均何之元王劭等其所著書或謂之春
秋或謂之紀或謂之畧或謂之典或謂之志雖名
各異大抵皆依左傳以為的准焉

史記周本紀元王八年崩定王介立索隱曰定
當為貞字之誤

春秋左傳魯哀公名蔣定公之子

史記周本紀慎胤王崩子赧王延立是為西周

史記秦昭王使將軍摎攻西周。西周君盡獻其邑。周初亡。昭襄王卒。子孝文王立。

史記秦二世名胡亥。立三年。為閭樂所殺。後漢書。獻帝諱協。初封陳留王。董卓廢少帝立之。

後漢書。荀悅。字仲豫。潁川人。獻帝時遷秘書監。帝以班固漢書文煩難省。乃令悅依左氏傳體為漢紀。

北史。高洋受魏禪。國號齊。隋書經籍志。張璠後漢紀三十卷。

晉書。孫盛。字安國。太原人。累遷秘書監。撰魏氏春秋二十卷。晉陽秋三十二卷。

晉書。干寶。字令升。新蔡人。以才器召為著作郎。王導薦之。元帝領國史。換晉紀。自宣迄愍。凡二十卷。

南史。陳何之元。廬江人。歷官諮議參軍。著梁典。起齊永元。終王琳被獲。凡七十五年。

(補注)

劉向錄戰國策叙云中書本號或曰國策或曰國事或曰短長或曰事語或曰長書或曰修書臣向以為戰國特游士輔所用之國為之策謀宜為戰國策

漢書司馬遷傳談卒三歲而遷為太史公五年而當太初元年十年而遭李陵之禍幽于繫獄卒述陶唐以來至于麟止凡百三十篇五十二萬六千五百字為太史公書

隋書經籍志春秋後傳三十一卷晉著作郎樂資撰

梁書裴子野傳子野字幾原河東聞喜人歷官中書侍郎初曾祖松之宋元嘉中受詔續修何承天宋史未及成而卒子野常欲繼成先業及宋永明末沈約所撰宋書既行子野更刪撰為宋畧二十卷約見而嘆曰吾弗逮也
梁書吳均字叔庠吳興人為建安王記室補國侍郎除奉朝請先是均表求撰齊春秋書成奏之高祖以其書不實付省焚之坐免職尋有勅

召見使撰通史均草本紀世家功已畢惟列傳未就普通元年卒按齊春秋梁書云三十卷南史謂二十卷
隋書王劭傳劭初撰齊志為編年體二十卷復為齊書紀傳一百卷或文辭鄙野或不執不物駭人視聽大為有識所嗤鄙

國語家

國語家者其先亦出於左丘明既為春秋內傳又稽其逸文纂其別說分周魯齊晉鄭楚吳越八國事起自周穆王終於魯悼公列為春秋外傳國語合為二十一篇其文以方內傳或重出而小異然自古名儒賈逵王肅虞翻韋曜之徒並申以注釋

治其章句、此亦六經之流三傳之亞也、暨縱橫互起力戰爭雄、秦兼天下、而著戰國策、其篇有東西二周、秦、齊、燕、楚、三晉、宋、衛、中山、合十二國、分為三十三卷、夫謂之策者、蓋錄而不序、故即簡以為名、或云漢代劉向以戰國游士為策謀、因謂之戰國策、至孔衍又以戰國策所書未為盡善、乃引太史公所紀、叅其異同、刪彼二家、聚為一錄、號為春秋後語、除二周及宋、衛、中山、其所留者七國而已、始自秦孝公、終於楚漢之際、比於春秋、亦盡二百三

十餘年行事始衍撰春秋時國語復撰春秋後語勒成二書各為十卷今行於世者唯後語存焉案其書序云雖左氏莫能加世人皆尤其不量力不度德尋衍之此義自比於丘明者當謂國語非春秋傳也必方以類聚豈多嗤乎當漢氏失馭英雄角力司馬彪又錄其行事因為九州春秋州為一篇合為九卷尋其體統亦近代之國語也自魏都許洛三方鼎峙晉宅江淮四海幅裂其君雖號同王者而地實諸侯所在史官記其國事為紀傳者

則規模班馬、創編年者、則議擬荀彧、為是史漢之體大行、而國語之風替矣、

後漢書賈逵字景伯扶風人歷官侍中、吳志虞翻字仲翔餘姚人歷官騎都尉、

吳志韋昭字弘嗣吳郡人歷官太子中庶子、史為晉文帝諱更曰曜、

前漢書劉向字子政楚元王之後歷官光祿大夫、史記秦獻公卒子孝公立索隱曰名渠梁、

晉書司馬彪字紹統高陽王睦之子太始中仕秘書郎彪總漢末州部之亂司冀徐克青荆揚

涼益幽羣盜僭叛皆紀之名九州春秋、晉書袁宏字彥伯陳郡陽夏人自吏部郎出為

東陽郡、撰後漢紀三十卷、

補注

崇文總目春秋外傳國語二十一卷吳侍中領左國史亭陵侯韋昭參引鄭衆賈逵虞翻

唐因合凡五家為注。自所發正者三百十事。隋書經籍注賈逵注二十卷。虞翻注二十一卷。王肅章句一卷。韋昭注二十二卷。唐書藝文志孔衍春秋時國語十卷。春秋後國語十卷。通考晁氏曰。袁宏在晉末為一時文宗。以東京史籍不倫。無所取正。惟張璠紀差詳。因參摭紀傳以損益之。比諸家號為精密。

史記家

史記家者其先出於司馬遷。自五經間行。百家競列。事跡錯糅。前後乖舛。至遷乃鳩集國史。採訪家乘。上起皇帝。下窮漢武。紀傳以統君臣。書表以譜年爵。合百三十卷。因魯史舊目。名之史記。自是漢

世史官所續皆以史記為名迄乎東京著書猶稱漢紀至梁武帝又勅其羣臣上自太初下終齊室撰成通史六百二十卷其書自秦以上皆以史記為本而別採他說以廣異聞至兩漢已還則全錄當時紀傳而上下通達臭味相依又吳蜀二主皆入世家五胡及拓拔氏列於夷狄傳大抵其體皆如史記其所為異者唯無表而已其後元魏濟陰王暉業又著科錄二百七十卷其斷限亦起自上古而終於宋年其編次多依放通史而取其行事

尤相似者共為一科故以科錄為號皇家顯慶中符璽郎隴西李延壽抄撮近代諸史南起自宋終於陳北始自魏卒於隋合一百八十篇號曰南北史其君臣流例紀傳羣分皆以類從各附於本國凡此諸作皆史記之流也尋史記疆宇遼濶年月遐長而分以紀傳散以書表每論家國一政而胡越相懸叙君臣一時而參商是隔此其為體之失者也兼其所載多聚舊記時插雜言

謂採世本國語國策等

故使覽之者事罕異聞而語饒重出此撰錄之煩

者也。况通史以降，蕪累尤深，遂使學者寧習本書，而怠窺新錄，且撰次無幾，而殘缺遂多，可謂勞而無功，述者所宜深誠也。

前漢書武帝諱微，景帝中子廢栗太子立之。

南史蕭道成字紹伯，蘭陵郡人，受宋禪，國號齊。

蕭衍字叔達，皇考順之，於齊高帝為始族弟，受齊禪，國號梁。

王莽，劉淵匈奴，石勒羯，慕容皝鮮卑，苻洪氏，姚萇，羌，為五胡。

魏書魏之先出自黃帝，黃帝以土德王，其俗謂土為托，謂后為拔，故以為氏。

北史齊陰王暉業，小新成弼之子，歷位司空，入齊降封美陽公，在晉陽無所交通，與魏蕭王家

世號辨宗錄，非科錄也。又元暉常山王遵之後，歷官尚書左僕射，頗愛文學，招集儒士崔鴻等

撰錄百家要事以類相從為科錄起伏義迄晉宋凡十四代表上之子玄云暉業者誤

唐書顧慶高宗改元

唐書李延壽者世居相州歷官符璽郎初延壽父大師以宋齊諸史南謂北為索虜北謂南為島夷思改正之未成而歿延壽追終先志北起魏登國盡隋義寧南起宋永初盡陳禎明為南北二史

〔補注〕

梁書武帝紀帝造通史躬製贊序凡六百卷又吳均傳有勅召見使撰通史起三皇迄齊代又蕭子恪傳帝謂蕭子顯曰我造通史此書若成史史可廢

漢書家

漢書家者其先出於班固馬遷撰史記終於今上

自太初以下闕而不錄班彪因之演成後記以續前篇至子固乃斷自高祖盡于王莽為十二紀十志八表七十列傳勒成一史目為漢書昔虞夏之典商周之誥孔氏所撰皆謂之書夫以書為名亦稽古之偉稱尋其創造皆准子長不為世家改書曰志而已自東漢已後作者相仍皆襲其名號無所變革唯東觀曰記三國曰志然稱謂雖別而體制皆同歷觀自古史之所載也尚書記周事終秦繆春秋述魯史止哀公紀年下逮於魏亡史記准

論於漢始如漢書者究西都之首末窮劉氏之廢興包舉一代撰成一書言皆精練事甚該密故學者尋討易為其功自爾迄今無改斯道於是考茲六家商確千載蓋史之流品亦窮之於此矣而樸散淳銷時移世異尚書等四家其體久廢所可祖述者唯左氏及漢書二家而已

後漢書班彪字叔皮扶風人避地河西依實秋光武召補徐令彪子固字孟堅顯宗時按蘭臺令史

前漢書太初武帝改元

書終繆公秦誓篇春秋終哀公十四年西狩獲麟

補注

後漢書班彪傳司馬遷著史記自太初以後闕而不錄彪乃繼採前史遺事作後傳數十篇譏正得失彪卒子固以父所續前史未詳乃潛精研思欲就其業既而有人上書顯宗告固私改國史詔收固下獄弟超詣闕上書具言固所述意而郡亦上其書顯宗奇之除蘭臺令史乃使終前所著書又列女傳曹大家一名昭博學高才兄固著漢書其八表及天文志未成卒和帝詔昭就東觀藏書閣踵而成之

通考東觀漢記漢謁者僕射劉珍校書郎劉駒駢等撰初班固在顯宗朝嘗撰世祖本紀功臣列傳至永初中珍駒駢等著作東觀撰集漢記其後盧植蔡邕馬日碑等皆嘗補續

通考三國志晉陳壽撰宋文帝傳其子命裴松之補注

史通訓故補卷之一終

孫端綬佩章
景緯揆基

史通訓故補卷之二

北平黃叔琳崑圃補註

海虞顧鎮備九叅訂

江陰蔡寅斗芳三同訂

二體第二

三五之代書有典文悠哉邈矣不可得而詳自唐
虞已下迄於周是為古文尚書然世猶淳質文從
簡畧求諸備體固已缺如既而正明傳春秋子長
著史記載筆之體於斯備矣後來繼作相與因循

假有改張變其名目。區域有限。孰能踰此。蓋荀悅
張璠。正明之黨也。班固華嶠。子長之流也。唯二家
各相矜尚。必辨其利害。可得而言之。夫春秋者。繫
日月而為次。列時歲以相續。中國外夷。同年共世。
莫不備載其事。形于目前。理盡一言。語無重出。此
其所以為長也。至于賢士貞女。高才雋德。事當衝
要者。必盱衡而備言。跡在沉冥者。不枉道而詳說。
如絳縣之老。杞梁之妻。或以酬晉卿而獲訃。或以
對齊君而見錄。其有賢如柳惠。仁若顏回。終不得

彰其名氏顯其言行。故論其細也。則纖芥無遺語。其麤也。則江山是棄。此其所以為短也。史記者。紀以包舉大端。傳以委曲細事。表以譜列年爵。志以總括遺漏。逮於天文地理。國典朝章。顯隱必該。洪纖靡失。此其所以為長也。若乃同為一事。分在數篇。斷續相離。前後屢出。於高紀則云。語在項傳。於項傳則云。事具高紀。又編次同類。不求年月。後生而擢居首帙。先輩而抑歸末章。遂使漢之賈誼。將楚屈原同列。魯之曹沫與燕荆軻並編。此其所以

國語特辭實
其事定無所
庸益

為短也。考茲勝負，互有得失。而晉世干寶著書，乃
盛譽丘明而深抑子長。其義云：能以三十卷之約，
括囊二百四十年之事。靡有遺也。尋其此說，可謂
勁挺之詞乎？案春秋時事入於左氏所書者，蓋三
分得其一耳。丘明自知其畧也，故為國語以廣之。
然國語之外，尚多亡逸。安得言其括囊靡遺者哉？
向使丘明世為史，而皆倣左傳也。至於前漢之嚴
君平、鄭子真，後漢之郭林宗、黃叔度、晁錯、董生之
對策，劉向、谷永之上書，斯並德冠人倫，名馳海內。

識洞幽顯言窮軍國。或以身隱位卑不預朝政。或以文煩事博難為次序。皆畧而不書。斯則可也。必情有所恡不加刊削。則漢氏之志傳百卷。併列於十二紀中。將恐碎瑣多蕪。闡單失力者矣。故班固知其若此。設紀傳以區分。使其歷然可觀。綱紀有別。荀悅厭其迂闊。又依左氏成書。剪裁班史。篇才三十。歷代保之。有踰本傳。然則班荀二體角力爭先。欲廢其一。固亦難矣。後來作者。不出二途。故晉史有王虞而副以千紀。宋書有徐沈而分為裴畧。

各有其美並行於世異夫令昇之言唯守一家而已

晉書華嵩字叔駿高唐人惠帝元康中轉秘書

丞嵩以漢紀煩穢復撰後漢書春秋左傳襄公三十年三月晉悼夫人食與人之城祀者絳縣人或年長矣往與于食有與疑年使之年曰臣生之歲正月甲子朔四百有四十五甲子矣史趙曰亥有二首六身是其日數也趙孟召之而謝過焉曰使吾子辱在泥塗武之罪也與之田使為君復陶

春秋左傳襄公二十三年齊侯襲莒莒子親鼓之獲杞梁齊侯歸遇杞梁之妻於郊使弔之辭曰殖之有罪何辱命焉若免于罪猶有先人之敝虛在下妾不得與郊弔齊侯弔諸其室史記屈原者名平為楚懷王左徒自原沉汨羅後百有餘年漢有賈生過湘水投書以弔屈原

賈生名誼洛陽人河南守吳公為廷尉乃言賈生年少頗通諸子百家之書文帝召為博士出為長沙王傅

史記刺客傳曹沫魯人為莊公將三戰北齊桓公與莊公會於柯沫執匕首劫桓公于壇盡歸魯之侵地荆軻衛人為燕太子丹刺始皇不中被殺

前漢書王貢傳序谷口有鄭子真蜀有嚴君平皆修身自保大將軍王鳳以禮聘子真子真不絀而終君平卜筮於成都市日問數人得百錢足自養則閉肆下簾而授老子依老莊之旨著書十篇餘言

後漢書郭太字林宗太原界休人辟司徒掾舉有道皆以疾辭

後漢書黃憲字叔度汝南慎陽人初舉孝廉又辟公府暫到京師而還終無所就

前漢書龍錯潁川人文帝時舉賢良能直言極諫者對策百餘人惟錯為高第

前漢書董仲舒廣川人武帝舉賢良文學之士
前後百數而仲舒以賢良對策第一

前漢書劉向成帝時遷光祿大夫時上無繼嗣
政由王氏災異寢甚向上封事極諫

前漢書谷永字子雲長安人舉太常丞時成帝
久無繼嗣數為微行趙婕妤從微賤專寵皆皇太
后與言舅所憂至親難數言乃推永使因天變
切諫永知有內應故展意無所依違

晉書王隱字處叔陳郡人過江依庾亮於武昌
撰晉書八十六卷

晉書虞預字叔憲徵士喜之弟除著作郎撰晉
書四十四卷

南史徐爰字長玉開陽人先是何承天草創國
史山讓之等踵成之宋世祖以爰領著作使終
其業爰雖因前作而專為一家之書

梁書沈約字休文吳興武康人梁武受禪以佐
命封建昌侯撰宋書一百卷

載言第三

不遵古法
左氏與以
經尚書其
笑正以

古者言為尚書事為春秋左右二史分尸其職蓋桓文作霸糾合同盟春秋之時事之大者也而尚書闕紀秦師敗績繆公誠誓尚書之中言之大者也而春秋靡錄此則言事有別斷可知矣逮左氏為書不遵古法言之與事同在傳中然而言事相兼煩省合理故使讀者尋繹不倦覽諷忘疲至於史漢則不然凡所包舉務存恢博文辭之記繁富為多是以賈誼鼂錯董仲舒東方朔等傳唯止錄

言罕逢載事。夫方述一事。得其紀綱。而隔以大篇。分其次序。遂令披閱之者。有所懵然。後史相承。不改其轍。交錯紛擾。古今是同。案遷固列君臣於紀傳。統遺逸於表志。雖篇名甚廣。而言獨無錄。愚謂凡為史者。宜於表志之外。更立一書。若人主之制冊誥令。羣臣之章表移檄。收之紀傳。悉入書部。題為制冊章表書。以類區別。他皆放此。亦猶志之有禮樂志。刑法志。又詩人之什。自成一家。故風雅比興。非三傳所取。自六義不作文。章生焉。若韋孟諷

諫之詩、揚雄出師之頌、馬卿之書、封禪、賈誼之論、
過秦、諸如此文、皆施紀傳、竊謂宜從古詩例、斷入
書中、亦猶舜典列元首之歌、夏書包五子之詠者
也。夫能使史體如是、庶幾春秋尚書之道備矣。昔
干寶議撰晉史、以為宜准左丘明、其臣下委曲、仍
為譜注、于時議者、莫不宗之。故前史之所未安、後
史之所宜革、是用敢同有識、爰立茲篇、庶世之作
者、觀其利害、如謂不然、請俟來哲。

禮記、動則左史書之、言則右史書之、
書、秦穆公伐鄭、晉襄公帥師敗諸穀、還歸作秦

誓、

前漢書、東方朔、字曼倩、平原厭次人、武帝時、為太中大夫、朔傳、有客難、非有先生論、賈誼傳、有弔屈原賦、鳴賦、又上疏言事勢、可為痛哭者一、流涕者二、長太息者六、龍錯傳、有上言兵事、又上言守邊備塞、勸農力本、當世急務二事、又十五夕對策、董仲舒傳、有賢良三策、前漢書、韋孟、魯人、為楚元王傳、傳子夷王、及孫王戊、戊荒淫不遵道、孟作詩諷諫、後漢書、初王莽末、沛國史岑子孝、亦以文章顯、莽以為謁者、注云、岑、一字孝山、著出師頌、非楊雄也、雄著趙充國頌、前漢書、司馬相如病、武帝使所忠往取其書、其妻曰、長卿未死時、為一卷書、曰、有使來求書、奏之、其遺札言封禪事也、史記、賈誼過秦論云、秦以六合為家、轂馬為固、一夫作難、而七廟隳、身死人手、為天下笑、何也、仁義不施、而攻守之勢異也、

書舜典、皋陶乃廢載歌曰、元首明哉、股肱良哉、

庶事康哉、
書、太康以逸豫滅厥德、吹于有洛之表、十旬弗
返、后羿因民弗忍、距于河、厥弟五人御其母以
從、後于洛之汭、五子咸怨、乃述大禹之戒、作歌
五章、

本紀第四

昔汲冢竹書是曰紀年、呂氏春秋肇立紀號、蓋紀者網紀庶品、網羅萬物、考篇目之大者、其莫過於此乎、及司馬遷之著史記也、又列天子行事以本紀名篇、後世因之、守而勿失、譬夫行夏時之正朔、服孔門之教義者、雖地遷陵谷、時變質文、而此道常行終莫之能易也、然遷之以天子為本紀、諸侯為世家、斯誠謹矣、但區域既定、而疆里不分、遂令後之學者、罕詳其義、案姬自后稷至于西伯、嬴自

真見

取得倒

未取

伯翳至於莊王。爵乃諸侯。而名隸本紀。若以西伯。伯。莊王。以上別作周秦世家。持殷紂以對武王。拔秦。始以承周赧。使帝王傳授昭然。有別豈不善乎。必。以西伯以前。其事簡約。別加一目。不足成篇。則伯。翳之至莊王。其書先成一卷。而不共世家等列。輒。與本紀同編。此尤可怪也。項羽僭盜而死。未得成。君求之于古。則齊無知衛州吁之類也。安得諱其。名字呼之曰王者乎。春秋吳楚僭擬。書如列國。假。使羽竊帝名。正可抑同羣盜。况其名曰西楚。號止。

伯王者乎。霸王者。即當時諸侯。諸侯而稱本紀。求名責實。再三乖繆。蓋紀之為體。猶春秋之經。繫日月以成歲時。書君上以顯國統。曹武雖曰人臣。實同王者。以未登帝位。國不建元。陳志權假漢年。編作魏紀。亦猶兩漢書首列秦莽之正朔也。後來作者。宜准於斯。而陸機晉書。列紀三祖。直序其事。竟不編年。年既不編。何紀之有。夫位終北面。一概人臣。儻追加大號。止入傳限。是以弘嗣吳史。不紀孫和。緬求故實。非無往例。逮伯起之次魏。乃編景穆。

於本紀以戾園虛諡間廁武昭欲使百世之中若
為魚貫又紀者既以編年為主惟叙天子一人有
大事可書者則見之於年月其書事委曲付之列
傳此其義也如近代述者魏著作李安平之徒其
撰魏齊二史魏彥淵撰後魏書李百藥撰北齊書於諸帝篇或雜載
臣下或兼言它事巨細畢書洪纖備錄如彥淵帝紀載沙苑
之捷百藥帝紀述淮南之敗是也全為傳體有異紀文迷而不悟
無乃太甚世之讀者幸為詳焉

呂氏春秋月令十二紀春秋左傳齊連稱管至父弑襄公立無知初無

知虐於雍康。莊公九年春。雍康弑。無知。春秋左傳。公子州吁。嬖人之子也。弑桓公而立。與石厚如陳。陳人執之。衛使右宰醜。泄殺州吁于濮。

晉書。陸機。字士衡。吳大司馬抗之子。吳平。入洛。撰晉三祖紀。

晉書。司馬懿。追尊宣皇帝。廟號高祖。昭追尊文皇帝。廟號太祖。炎謚武皇帝。廟號世祖。

吳志。孫和傳。和字子孝。權太子。為全公主所誣。廢為南陽王。及子皓即位。追尊和為文皇帝。章

昭傳。皓欲為和立紀。昭以和不登帝位。宜名為傳。

北史。魏收。字伯起。鉅鹿人。天保初。除中書令。兼著作郎。

魏書。景穆皇帝。諱晃。太武長子也。正平元年。薨于東宮。及太武被弑。文成皇帝即位。景穆之長

子也。追尊為帝。魏書。太武本紀。景穆皇帝附。前漢書。武帝戾太子據。元狩元年。立為皇太子。

後以江充巫蠱事起兵誅充兵敗東至朔陰自
經宣帝即位議曰戾以朔閭解邪里聚為戾園
前漢書昭帝諱弗陵武帝少子立十三年

補注

史記周本紀載后稷封命至秦滅東西周秦本
紀成女脩生大業大業生大費佐舜調馴鳥獸

是為羽翳賜姓贏氏至諸侯滅秦
史記項羽本紀項籍者下相人太史公曰羽非

有尺寸乘勢起隴畝之中三年還將五諸侯滅
秦分裂天下而封王侯政由羽出號曰霸王五
年卒亡其國

魏志武帝紀載太祖於漢靈帝中平六年起兵
獻帝初平二年為東郡太守興平元年拜兗州
牧建安元年錄尚書拜司空行車騎將軍封武
安侯十三年為丞相十八年為魏公二十一年
進爵為王二十五年崩於洛陽皆紀漢年號

世家第五

自有王者、便置諸侯、列以五等、疏為萬國、當周之東遷、王室大壞、於是禮樂征伐、自諸侯出、迄乎秦世、分為七雄、司馬遷之記諸國也、其編次之體、與本紀不殊、蓋欲抑彼諸侯、異乎天子、故假以宅稱、名為世家、按世家之為義也、豈不以開國承家、世代相續、至如陳勝起、自羣盜稱王、六月而死、子孫不嗣、社稷靡聞、無世可傳、無家可宅、而以世家為稱、豈當然乎、夫史之篇目、皆遷所創、豈以自我作

由後邈前世
宋之名尚可
假借不比西
伯莊王已上
之樂舞也

古而名實無准。且諸侯大夫家國本別。三晉之與
田氏。自未為君而前。齒列陪臣。屈身藩后。而前後
一統。俱歸世家。使君臣相雜。升降失序。何以責季
孫之八佾舞庭。管氏之三歸反坫。又列號東帝。抗
衡西秦。地方千里。高視六國。而沒其本號。唯以田
完制名。謂田完世家也。求之人情。孰謂其可。當漢氏之有
天下也。其諸侯與古不同。夫古者諸侯皆即位建
元。專制一國。綿綿瓜瓞。下世長久。至於漢代。則不
然。其宗子稱王者。皆受制京邑。自同州郡。異姓封

侯者必從官天朝、不臨方域、或傳國唯止一身、或襲爵才經數世、雖名班爵胙土、而禮異人君、必編為世家、寔同列傳、而馬遷強加別錄、以類相從、雖得畫一之宜、詎識隨時之義、蓋班漢知其若是、釐革前非、至如蕭曹茅土之封、荆楚葭莩之屬、並一槩稱傳、無復世家事勢當然、非矯枉也、自茲已降、年將四百、及魏有中夏、而揚益不賓、終亦受屈、中朝見稱偽主、為史者必題之以紀、則上通帝王、勝之以傳、則下同臣妾、梁主勅撰通史、定為吳蜀世

義記之名當
矣

家持彼僭君比諸列國去太夫甚其得折中之規
乎次有子顯齊書北編魏虜牛弘周史南記蕭登
考其傳體宜曰世家但今古著書通無此稱用使
馬遷之目湮沒不行班固之名相傳靡易者矣

玉海燕楚趙韓魏齊秦曰七國又曰七雄
史記陳勝二世元年七月起兵攻陳召三老豪

傑與議皆曰將軍伐無道誅暴秦復楚國之社
稷功宜為王涉乃立為王臘月兵敗運至下城
父其御莊賈殺以降秦

史記晉文侯始建趙氏于晉國傳至趙籍晉獻
公以魏封畢萬傳至魏斯韓之先姬姓事晉得
封於韓原曰韓武子傳至韓虔三卿分晉立為
諸侯

史記陳完者陳厲公佗之子也以太子禦寇之

難奔齊為工正完卒諡曰敬仲敬仲之如齊以陳氏為田氏其後田和伐齊為齊侯傳至湣王

自立為東帝已而去帝號復為王

前漢書蕭相國何者沛豐人從高祖定天下封

酈侯

前漢書曹參者沛人高祖為沛公而初起也參

以中涓從六年封平陽侯

前漢書劉賈諸劉者不知其何屬漢六年廢楚王信分其地為二國立賈為荆王王淮東五十

二城

前漢書楚元王劉交高祖之同母少弟也字游

高祖六年以交為楚王都彭城

字游蕭子顯字景暢豫章王嶷之子梁天監初

遷邵陵王友兼侍中撰齊書

隋書牛弘字里仁安定鴉觚人開皇中授秘書

監封奇章郡公撰周史

北史蕭瑄字理孫昭明太子第三子初封曲江

縣公與梁元帝相攻附庸于西魏周文帝平江

陵乃命登主梁祀、登稱帝於其國、傳至孫琮、入
隋、降為莒國公、

列傳第六

夫紀傳之興肇於史漢。蓋紀者編年也。傳者列事也。編年者。歷帝王之歲月。猶春秋之經。列事者。錄人臣之行狀。猶春秋之傳。春秋則傳以解經。史漢則傳以釋紀。尋茲例草創。始自子長。而朴畧猶存。區分未盡。如項王立傳。而以本紀為名。非唯羽之僭盜不可同於天子。且推其序事。皆作傳言。求謂之紀。不可得也。或曰。遷紀五帝夏殷。亦皆列事而已。子曾不之恠。何獨尤於項紀哉。對曰。不然。夫五

原紀傳立名
之旨亦以區
分品地耳非
必編年而後
成紀述事即
為傳也如楚
得無人誌

帝之與殷夏也正朔相承子孫遞及雖無年可著
紀亦何傷如項羽者事起秦餘身終漢始殊夏氏
之后羿似黃帝之蚩尤譬諸閏位容可列紀方之
駢拇難以成編且夏殷之紀不引他事夷齊諫周
實當紂日而析為列傳不入殷篇項紀則上下同
載君臣交雜紀名傳體所以成嗤夫紀傳之不同
猶詩賦之有別而後來繼作亦多所未詳案范曄
漢書紀后妃六宮其實傳也而謂之為紀陳壽國
志載孫劉二帝其實紀也而呼之曰傳考數家之

此體自史記
伯夷傳首先
標許由隨光
來

所作其未達紀傳之情乎苟上智猶且若斯則中
庸故可知矣又傳之為體大抵相同而述者多方
有時而異耳如二人行事首尾相隨則有一傳兼
書包括令盡若陳餘張耳合體成篇陳勝吳廣相
叅並錄是也亦有事跡雖寡名行可崇寄在它篇
為其標冠若商山四皓事列王陽之首廬江毛義
名在劉平之上是也自茲已後史氏相承述作雖
多斯道多廢其同於古者惟有附出而已尋附出
之為義攀列傳以垂名若紀季之入齊額臾之事

魯皆附庸自託得廁於朋流然世之求名者咸以
附出為小蓋以其因人成事不足稱多故也竊以
書名竹素豈限詳畧但問其事竟何如耳借如邵
平紀信沮授陳容或運一異謀樹一奇節並能傳
之不朽人到于今稱之豈假編名作傳然後播其
遺烈也嗟乎自班馬以來獲書於國史者多矣其
間則有生無令問死無異跡用使游談者靡徵其
事講習者罕記其名而虛班史傳妄占篇目若斯
人者可勝紀哉古人以沒而不朽為難蓋為此也

春秋左傳昔有夏之方衰也。后羿自鉏遷于窮石。因夏民以代夏政。不修民事。而滯于原獸。寒

浞與寒相殺之。

史記神農之時。蚩尤作亂。黃帝與戰於涿鹿之野。擒而殺之。

宋書范曄字蔚宗。順陽人。歷官太子詹事。撰後漢書。

晉書陳壽字承祚。蜀巴西人。歷官秘書郎。著魏吳蜀三國志。

史記陳餘張耳兩人相與為刎頸交。陳涉兵起。武臣立為趙王。以餘為大將軍。耳為右丞相。章邯圍耳于鉅鹿。怨餘。餘乃解印綬于耳。復收趙地。漢三年。耳與韓信擊破趙井陘。斬餘。泚水上。史記陳勝陽城人。字涉。吳廣陽夏人。字叔。二世發間左戍漁陽。勝廣為屯長。會天雨失期。乃謀曰。今亡亦死。舉大名亦死。死國可乎。乃舉兵。號為張楚。

前漢書王貢等傳序。漢興有園公。綺里季。夏黃

公角里先生當秦之世避入商雒深山高祖召之不至呂后用留侯計迎致之從太子見高祖客而敬焉

前漢書王吉字子陽琅邪阜虞人為昌邑中尉免復起為益州刺史

後漢書劉平趙孝等傳序廬江毛義以孝稱南陽張奉往候之坐定而府檄適至以義守令義喜動顏色奉心賤之及義母死公車徵不至奉嘆曰賢者固不可測徃日之喜為親屈也

後漢書劉平字公子彭城人永平三年拜宗正春秋左傳莊公三年紀季以鄒入于齊紀于是乎始判

史記蕭相國世家上聞淮陰侯誅使使拜丞相何為相國令卒五百人一都尉為相國衛諸君皆賀郡平獨弔平故秦東陵侯秦破為布衣貧種瓜于長安城東門世俗謂之東陵瓜平謂相國曰置衛衛君非以寵君也願君讓封無受悉以家私財佐軍何從其計

史記項王本紀羽意圖漢滎陽漢將紀信誑楚
夜乘黃屋車傳左肅曰食盡漢王降楚軍皆呼
萬歲漢王乃與數十騎從城西門出走成集羽
見信曰漢王安在曰已出去矣羽燒殺信

後漢書袁紹傳韓馥以冀州讓袁紹紹辟沮授
為別駕與平二年車駕為李傕等所迫于曹陽
授說紹宜迎大駕紹不能用授後為魏武所執
謀還袁氏見殺

後漢書臧洪傳初洪為袁紹所圍也洪邑人陳
容為洪東郡丞先城未敗洪使歸紹洪被執時
容在坐見洪當死起謂紹曰臧洪發舉為郡將
奈何殺之紹慚使人牽出謂曰汝非臧洪儔空
復爾為容曰仁義何常蹈之則為君子背之則
為小人今日寧與臧洪同日死不與將軍同日
生也復見殺在坐者無不嘆息竊相謂曰如何
一日殺二烈士

補注

後漢書有皇后紀吳志稱吳主傳蜀志稱先主

傳

孫端綬佩章
景緯揆基校

史通訓故補卷之二終